

Q. F. F. Q. S.

DISSERTATIO ACADEMICA

DE

**COMMORATIONE
HYBERNALI
ET
PEREGRINATIONIBUS
HIRUNDINUM,**

QUAM

Consentiente Facultate Medica in Academia Aboënsi,

P R Ä S I D E

EXPERIENTISSIMO & AMPLISSIMO VIRO,

D^N. JOHANNE LECHE,

MED. DOCT. & PROFESS. ORD.

Atque Reg. Acad Scient. Sveticæ MEMBRO,

Naturæ Curiosorum benevolæ disquisitioni modeste submittit

JOHANNES GRYSELius,

NERICiUS.

In AUDIT. MAJ. d. XXIX FEBR. MDCCLXIV.

Hor. ante meridiem confvetis.

ABQÆ, Impressit Joh. CHRISTOPH. FRENCKELL.



PRÆFATIO.

In errores Physicos non minus quam morales maxime prouum esse genus humanum constat: Physicos quod attinet, ab iis nec Docti, qui que multa experientia pollent, semper immunes sunt; Vulgus vero, cum hos scopulos caute præternavigare non didicerit, fere semper impingit. Nec mirum, cum adminiculis ex Physica & Mathesi sumendis uti non didicerit; hinc nec experientia rite facere, nec de obviis recte judicare, nec fere alia accurate observare novit, nisi quæ ad opera consveta pertineant. Ut morbi, qui simul multos affligunt, Epidemici audiunt, ita errores, qui apud vulgum recepti sunt, Epidemicos quoque vocare solemus. Hujus Epidemiacæ quidam errores tolerabiles esse judicantur, quamdiu nihil mali ab iis produci constat. Qui vero noxam conjunctam habent, eos

Impensis Joh. Chimento, Nurembergi.

Rei-

Reipublicæ interest quantocius funditus deleri; adeo-
que civium, qui emunctioris nasi sunt, officium esse
censeo, ut eos pro viribus expurgent. Ut res clari-
or evadat, exempla errorum hujus generis addam:
Bromum secalinum interdum transformari in secale,
hocque rursus in Bromum. Hinc damnsa hæc exi-
stit consequentia, ut Agricolæ negligent sementem pù-
ram facere; imo de industria Bromum cum secali mi-
sceant, sperantes, sed fruitra, inopiam secalis Bromo
in hoc degenerante, affatim refaciendam. Alius er-
ror est, Avenam in Secale commutari: Quam altas
hoc præjudicium in vulgi animis egerit radices, an-
te aliquod tempus non sine admiratione vidimus ex
scriptis eristicis, quæ magnam partem pagellarum
hebdomadalium implebant. Nec hic innoxius est, cum
illi, qui rem ita se habere credunt, experiundo ope-
ram & tempus perdant; in eo enim agro, cui ave-
na sola commissa est, ratione & vera experientia di-
gitantibus, nunquam secale crescat; & nullibi nisi ex
seminibus propriis, quæ forte alii sementi in horreo
commista, vel alio quocunque modo in agro diffe-
minata fuerant. Error ille antiquis pariter ac nostri
ævi hominibus communis, nempe quod Ros melleus
ab aëre eadat, atque Segetes Pomaria & Lupulum cor-
rumpat, eo respectu noxius esse reperitur, quod cau-
sam noxæ vulgus quærat, ubi nunquam fuit. Sic
morbus cuius causa æque ignota est ac modus, quo
noceat, vix nisi casu curatur; cum morbus rite co-
gnitus certius sanetur. Errores Oeconomiæ calami-
tatem adferentes Oeconomis expugnandos committi-

mus; Nobisque hac occasione illum solum persequendum elegimus, quo apud vulgum hirundinibus aquæ fundus in diversorium hybernum assignatur. Multi quidem Eruditorum, per totam fere Europam habitantes vulgo credunt, quod nec otium nec occasio permiserint in rem experimentis inquirere. Ego vero satis superque gnarus, vulgi experimenta raro fida esse, ipse certitudinem hujus asserti diu atque operore, sed in vanum quæsivi. Cum autem experientia in hoc ipso argumento me docuerit, quam difficilis & odii plena res sit, opinionem semel conceptam & jam inveteratam ex hominum delere animis, maxime inconditi & imperiti vulgi, Te, Lector Benebole, enixe rogo, ut conatibus innocuis faveas.

S. I.

Ex antiquorum pariter & recentiorum scriptis notum omnibus existimo, nullam in tota Europa regionem esse, in qua Hirundo, autumno incipiente, non dispareat. Ubi autem per hyemem commoretur, variae variorum sunt sententiæ: In cryptis montium eas latere Aristoteles vult: Pechlinus occultatum se dicit testem, hirundinum examina in cavernis montium & scopulis maris L gurini esse reperta. Transl. Philol. p. 44. In quercubus cavis Germaniae Superioris delitescere alii: Gesnerus affirmat, se vidisse hirundinem quasi mortuam in nido absconditam: Anglis, Polonis, Germanis, Svecis, Fennique persuasum est, eas in aqua demersas hyemem transi-

transfigere: Non autem Hirundines solas, sed & **Ciconias**, ex veteri traditione, aquæ per totam hyemem esse submersas, nulla probabilitatis specie, narratur: Aristoteli & Plinio notissimum quidem erat, Hirundines autumno instantे abire; sed quod in aqua, durante frigore, commoren tur, utrisque erat inauditum: Nec Conrado Gesnero notum erat, talia a quopiam credi; aut si innotuit, pro fabula habuit commemoratione haud digna: Lutherum Germanis suis credidisse, in sermonibus convivalibus C. 49. Fol. 365, perhibetur: Olaus Magnus Upsaliensium Archi-Episcopus primus fere scriptor est, saltem apud nos, cui hoc commentum placuit: Ex Olao Schefferus & Hevelius pluresque sua habent. His tamen consensum tribuere Rajus noluit, ubi in Willughbeji Ornithol. p. 155. his Aldrovandi verbis utitur: *Verissimus videtur eas in regiones calidores Aegyptum puta, aut Aethiopiam avolare, quam vel in arboribus cavis vel in foraminibus rupium, aut veterum aedificiorum, vel in aquis sub glacie laterē.* Aldrovandus Ohith, lib: XVII. citat verba Petri Martyris, qui *hyematum, inquit, Alexandrium Hirundines, Milvos cæteraque volucres e nostris regionibus Europæ transvolantes tendere cognovi.* Si Aldrovando & Rajo largior sim, & tantisper concedam vera esse, quæ Pechlinus se observasse affirmat, atque statuam Hirundines hyemes Italiæ, quando mitiores sunt, sustinere posse; quis inde inferre poterit, eas Germaniæ nedum Sveciæ frigori sustinendo esse pares; cum congelatio, quam hic effugere non possent, corpora earum destrueret; nulum

lum enim animal, cui sanguis calet in sanguine ullum gradum punto congelationis vicinum facile sustinet. Neque Ranæ, quibus friget sanguis, frigori hyberno feso exponunt; sed in aquæ fundo per hyemem delitescunt; quæ vero aquam non profundiorem invenerunt, quin ad fundum usque in glaciem convertatur, omnes intereunt. Hunc frigoris in corpora animalium effectum qui consideraverit, non facile subscrivet eorum sententiæ, qui in arborum cavarum truncis Hirundines hyberna habere statuunt; nec dubitabit Hirundinem Gesneri in nido verius mortuam, quam quasi mortuam fuisse. Si maxime concedam instinctum avium adeo accuratum non esse, quin aliquando ita aberret, ut tempestate itineri favente neglecta, frigori repente oborienti exponantur, atque ideo in arboribus cavis se abscondere cogantur, necessum quoque est credere, eas certo certius ibidem perire debere, nisi post unum alterumve diem serenitas & tempus aëri rediens, iter continuare iis concedat; Nec video quomodo me expediam, si quis objiciat, in Scania arborum cavarum numerum magnum esse, & tamen Hirundines in iis nunquam inventas. Securior a deprehensione mentitur, qui de rebus in peregrina terra gestis sermonem occipit: Ideoque credibile est, Pechlinum vulgi dictamina instar propriæ experientiæ venditasse potius, quam per maris pericula tempore autumnali adeo pluvioso & procelloso in rem inquisivisse. Si enim in cryptis montium, se abscondant, id in Italia debent facere circa quintum Odobris, ut inferius demonstrabo; sed ob pluviam, non ob

ob frigus; & pluvia desinente, claros tepidosque dies in Italia succedere necesse est; prout in Scania obser-
vavit Celeberr. Præses diem 12. Novembris st. n. ad-
eo jucundum fuisse, ut fœnimessor gramen, in prato ad hunc usque diem neglecto, secare potuerit. Hinc
utrumque clima quum confero, non possum, quin di-
cto tempore Italæ tam calidos dies tribuam, ut hac
parte superent dies, quibus Hirundines ad nos rede-
unt. Ideoque aut a sopore resuscitari debent, aut fal-
sum est eas ibi latere.

§. II.

Aliam non minus absurdam fabulam a nostratis-
bus audivi: Hirundinem in bovili per totam hyemem
degisse, & a redeuntibus sociis male acceptam & mul-
ctatam ob desertionis nefas. Quis autem non videt,
præter rationem hæc dici; posito enim in bovili fa-
tis caloris fuisse, ut avis frigoris adeo impatiens de
vita non periclitaretur; vix tamen quisquam credere
posset, eam inediā sustinere potuisse, per septem
mensēs hybernos, quibus durantibus, ne unicūm qui-
dem infectum in bovili visui se offert. Si dicat ali-
quis Hirundinem illam per menses frigidos torpuisse
penitus, & sic instar infecti torpentis alimento non
indiguisse, respondebo: sangvinem corporis tam par-
vi & natura sua tam calidi non posse, quin a natu-
rali constitutione, etiam per illum gradum frigoris,
qui in stabulo est, ita degeneret, ut stagnare & vi-
ta finem imponere debent. Ideoque sapientius fides
toti historiæ denegatur, quam in fabula physice ex-
pli-

plicanda desudatur. Fabulam esse agnoscer, quicunque perpenderit, rem semel possibilem pluries existere posse, ideoque hujus rei exempla plura apud vulgum prostare debere, quam ut a fama reticerentur; sed non prostant; Ergo aut res falsa est, aut fama nostro tempore ab ingenio antiquo deflexit. Mihi certe videtur, vulgum in convivio rustico ab Eрудito quodam hanc historiam habuisse, qui eam ab aliquo Poëtarum hauserat. Et quis fide dignabitur plebejam illam relationem, quam nuper in Novellis provincialibus legimus. Alaudas quatuor in ericeto humili repertas hyemare & quidem supinas; cum omnibus notum esse possit, hanc avem ad finem æstatis abire. Neque hæc ignota sunt Aucupibus Germaniæ, qui sciunt commeantibus insidiari, & quovis autumno ingentem adeo numerum retibus capiunt, ut eus ejus copiosior incolis lithiasin aut causari, aut sopitam resuscitare observatus sit.

§. III.

Cum plurima hallucinationum exempla, ut superius indicavi, apud vulgum occurrant, famam de hirundinum mansione hyberna sub aqua, præsertim cum adeo anomala sit, suspectam habui. Adeoque eam ex præjudicio potius, quam ex observatione ortam suspicatus sum. Etiamsi vero non paucæ rationes succurrerent, quare de veritate rei me jure dubitare existimem; tamen priusquam rem penitus damnarem, omnem movendum lapidem duxi, ut sciscitando ubique notitiam acquirerem, num quis posset dice.

dicere, se ipsum vere vidisse hirundines per retia pi-
 scatoria ab aqua extractas esse. Sic varias variorum
 narrationes mihi contigit audire; alii enim asserebant,
 se suis oculis vidisse vel duas integras tonnas, uni-
 ca pescatione a fundo maris protractas, fidem facilius
 inventuri, si minus largi fuissent. Idem judicium ma-
 net idem Ethmulleri effatum in Diss. 2. C. 10. N. 5.
 Id vero miratus sum, quod qui mihi narrarunt se vi-
 disse Hirundines ab aqua extractas, omnes hoc in pu-
 eritia sua factum dixerint. Alii, quorum in numero
 etiam pescatores erant, dubitanter responderunt, se-
 que sope rem relatain accepisse, nunquam vero vi-
 disse; quod mirum admodum mihi visum est; ubivis
 enim per astatem sunt Hirundines, ergo ubivis pisca-
 tores eas per hyemem invenisse oportuit. Imo in-
 tegrum regionis tractum esse cognovi, ubi nullae cir-
 cumstantiae, quæ ad hoc experimentum requiruntur,
 deficiunt, & tamen incolis ne fando quidem rem au-
 ditam comperi. Quid itaque hac fama morbi epide-
 mici similius est, qui in una parœcia furit & ab al-
 tera exulat? Alii denique, qui pro oculatis testibus
 se venditarunt, me dubitarem, ostensis Hirundinibus
 ab aqua extractis se convicturos confidenter dictita-
 runt. Sed promissis stare non potuerunt; non quod
 neglexerint, quia ipse, qui volui vinci, interim ad-
 monitione eis molestus esse non desii; sed quod nec
 ipsi, nec ullus eorum, quibus res eadem commissa-
 erat, unicam invenerint. Vir quidam apprime ho-
 nestus promisit, se tuorum responsa mihi renunciatiu-
 rum; & paulo post scripsit, se oceurrisse cuidam Phi-
 loso-

Iosophiæ Magistro, qui interrogatus asseveravit, se propriis oculis vidisse Hirundines extractas atque in hypocaustum illatas revixisse. Huic itaque Magistro epistolam scripsi, in qua sedulo exposui rationes ob quas sententiaæ vulgi accedere nondum quiverim, rogavique ut bona fide visa non vero audita circa hanc quæstionem mihi referret. Ille jam in epistola responsoria confitebatur, se ipsum quidem nunquam vidisse Hirundines ab aqua protractas; sed cum in parœcia quadam maritima Informatorem ageret, sœpius a pescatoribus fide dignis hanc historiam audivisse. Concludo itaque pescatores illos æque faciles esse potuisse ac ipsum Magistrum ad aliorum narrationes sœpe auditas & sœpius repetitas firmiter adeo credendas, ut tandem eas instar propriæ experientiæ venditare non dubitaverint. Ideoque cum ocurrerim personis pluribus adeo levibus, ut initio colloquii se vidisse dixerint; deinde vero, rationibus redacti, eadem rursus negare non dubitaverint, nec Pechlini nec Ethmulleri effatum firmiore fundamento niti, quam tabibus plebeculæ traditionibus, certus sum; si enim Hirundines, ut fama est, arundinibus insidentes eas rostri ope ad radices usque sequantur, eodem loco debent delitescere. Sed quis ibi per hyemem retia ducere potest, cum arundines una extremitate in glacie hærent, altera fundo. Neque quidquam tribuo testimonio D:ni Colas, qui coram Societate Regia Londinensi asseveravit, se duas vidisse Hirundines, quæ aquam nuper reliquerant, ad eo

eo languidas, ut pedibus vix insistere potuerint, aliasque humore aggravatas iis dependisse, quid enim aliud hoc erat, quam vitium subreptionis in expriundo; cum multæ langvoris causæ esse potuerint, & ipse non viderit, sed crediderit solum, eas ab aqua emersas. Quidam eorum, qui præjudicio huic succubuerunt, serio triumphant, dum contradicentibus opponunt argumentum, quod credunt invincibile: Se nempe observasse Hirundines, postquam emerserant, in sepibus confesdisse, ut in sole penas humidas siccarent; seque a nitore pennarum securè conclusisse ad madorem? Quam certe autem hoc argumentum fallat, iis notum est, qui sciunt, penas Hirundinum semper nitere & eo magis, quo aptior situs est ad splendorem in oculos intuentis reflectendum, & quo sicciores; Nam penna pavonis dimidium splendoris amittit humectata. Sic fabulas perpetuitati consecrat credulitas.

§. IV.

Cur autem mihi verisimile non videatur, Hirundines per hyemem in aqua degere, plures rationes sunt, quas hic ordine recensere animus est.
Prima: quod Motacillæ cinereæ & que libenter super arundinibus pernoctent ac ipsæ Hirundines. Vidi enim sope motacillas advesperascente cœlo urbem catervatim deserentes in arundinetum se recipere, quod dimidium fere milliare remotum erat. Cum autem motacillæ non demergantur, credo Hirundines, non ut demergantur, sed ob alteram causam
 B 2 ambō-

ambobus generibus communem, in arundinibus ver-
fari; adeoque ambo hæc volucrum genera æquo
jure migratoriis adnumeranda. Cur autem non po-
tius in sylvis, quam in arundinibus pernoctant?
Dicam: Postquam hirundines abiisse vidi, Thermo-
metro Celsiano indice, septendecim gradus caloris
aquam adhuc fovere expertus sum; sed cum forte
ultra duas septimanas, antequam abeant, hoc di-
versorio utantur, credibile est, ad minimum vigin-
ti gradus caloris aquæ fuisse eo tempore, quo a-
rundines frequentare incipiunt. Aqua quo densior
est aëre, eo longiore tempore indiget, antequam
ad refrigerationem redeat; aër autem a multorum
graduum calore paucis horis ad frigus glaciale transit.
Sic frigente aëre aqua adhuc calens, aviculas calo-
re exhalante foveat; & arundinetum ventorum vim
frangit. Calor itaque & ventorum impetus mode-
ratus hirundines & cœteras aviculas ad arundines
alliciunt. In sylvis vero calor e terra ascendens prius
dissipatur, quam ad aviculas in ramis & cacumini-
bus arborum pernoctantes pervenire potest. Sic ve-
ram causam cum vulgus non assequeretur, ob fal-
sam hanc hirundines arundinibus pro hospitio uti
eredidit, ut algore nocturno stupefactæ in aquam
deciderent. Enim lubricum hujus fabulæ fundamen-
tum & satis ridiculam occasionem. Ne autem to-
tum genus rapinis piscium expositum ad internecio-
nem daretur, prudentioribus necesse visum est in-
ter pisces & hirundines fingere antipathiam: Huic,
veram rationem non videntes, tribuunt quidam,
quod

quod pisces capere non possint in iis locis, ubi hirundines hyemare supponunt. Hic etiam adscriptum a cive quodam Aboensi memini, quod Cyprinus (Aspius) non tetigerit pullos hirundinum in hamis positos, sed pullos passeris domestici lubentissime. Nullo autem inniti fundamento hoc assertum judicavi, cum alio tempore interrogatus fassus sit, pullos hirundinis adultiores fuisse, passeris vero ante unum vel alterum diem exclusos; sed nec hos adultiores piscibus placuisse. In Italia, forte etiam in Græcia, hirundines non abiguntur a frigore, sed a pluvia, vid. §. XIII. adeoque vulgo nulla occasio similia comminiscendi. Quid ergo mirum, quod nec Aristoteles nec Plinius de hac re quidquam commentati fuerint.

§. V.

Secunda ratiō: Quomodo hæc cohærere existimandum, quod hirundines calor aquæ septendecimi gradum Augusto mense torpentes detineat; vid. § IV. novem vero vel decem veris tempore sufficient ad sensum & vigorem, tot enim aquæ esse expertus sum eo tempore, quo hirundines rediisse animadvertei. Sed eodem tempore in mari, circa nostrum Archipelagum nullum glaciei vestigium amplius supererat; nec nivis minimus cumulus in montibus se prodiebat; ergo multo pauciores caloris gradus, forte non plures quam quatuor vel quinque, aquæ esse credendum est, quando hirundines apparent antequam glacies maris & fluminum omnis liquata

est. Sed tam paucos ad sensum, hirundinibus restituendum, si in aquis laterent, non sufficere quis non videt.

§. VI.

Tertia ratio: Quod in Nauelerorum Aboënsium ephemericibus notatum viderim, navigantes in medio fere sinus Codani plurimas avium species vidisse prætervolantes, atque inter reliquas etiam hirundines fuisse, quarum novendecim in antennis simul resedisse visæ sunt. Quis autem sibi persuadere poterit, has novendecim tantum in itinere constitutas fuisse? Ego eerte credo comitatum magnum fuisse; sed reliquis prætervolantibus, solas languidas & ægras quietem in navi quæslivisse.

§. VII.

Quarta ratio: Quod nulla avis submergi possit, quamdiu pennis plumisque corpus debito modo tectum est. Hæc regula non tolerat exceptionem, cum aves maximæ & minimæ, aquaticæ & sylvestres supernatent. Vidimus sc̄epe, quia experimentum est domesticum, gallinas in vasis magnis aqua plenis, quin etiam in puteis suffocatas, semper in superficie aquæ hæsille; nec unquam submersam avem vidi nisi deplumatam. Non est cur quis objiciat, aves aquaticas, quamvis aqua leviores, ad fundum aquæ descendere posse; hoc enim motitatione pedum efficiunt; & quidni, cum homines, quorum corpus gravitatem specificam aqua majorem nactum est, tamen per artuum agitationem aquæ

aqua supernatare possint. Ergo pennarum levitas prohibebit hirundines sub aqua retineri, etiamsi supponantur maximo nisu fundum petiisse. In vanum etiam objicitur, pennas diu in aqua maceratas tandem submergi; hoc enim experientia refragatur. Et si maxime pronus essem ad concedendum hunc aqua in pennas effectum, quid inde opis ad hypothesin stabilendam existeret; Hirundines enim in superficie aqua natantes vi ventorum ad littora pellerentur, antequam pennae satis maceratae essent. Et sic fluctibus jactatae non effugerent hominum oculos. Sed haec nunquam dicta, multo minus facta vulgum etiam pronunciaturum esse satis scio. Ut autem evictum reddatur, hirundines posse submergi, confugiunt quidam ad lapidem Chelidonium. quem ejusdem esse natura cum lapidibus Cancerum hariolantur, qui statim tempore ad insignem magnitudinem increscunt, rursusque alio tempore ita decrescent, ut nulli fiant; Chelidonium vero lapidem autumno instanti, tantam molem & cum mole pondus acquirere, ut hirundines submerget; In submersis autem iterum decrescere, donec sub veris initio nulla ejus vestigia remaneant. Atque sic, restituta pristina levitate, avem ad superficiem aqua attolli. Sed quis non videt, haec & ficta & absurdia esse.

§. VIII.

Quinta ratio: Si hirundines in aqua fundo per hyemem hospitentur sopitae, denuo expergescidentiae

& postquam ver rediit; sequitur eas interea vitam aliqualem vixisse; ideoque nec caruisse circulatione sanguinis; cum vero hujus circuitus non possit per pulmones perfici, nisi hi alternis vicibus aëre distendantur, idque aqua prohibeat; oportet eas instructas esse foramine ovali & canali arterioso, per quas vias sanguis eo tempore, quo per pulmones ei non datur transitus, a dextra cordis auricula ad sinistram & a ventriculo cordis dextro ad arteriam aortam, ut in fœtu sit, pervenire possit. Sed cum nemo Anatomicorum has vias in corde hirundinis invenerit, nec ego, qui de industria inquisivi; facile patet, eam in aquam præsertim frigidam delabi non posse sine mortis periculo. Ne autem quid desiceret, hirundinem (Prognen) vivam in aqua detinui; sed non potuit fundum vasis attingere, nisi manu eam eo truderem, & vicissim ad superficiem aquæ levitate propria adscendens, aphelatione significavit, non aliam viam præsto esse, per quam sanguis circulum absolveret, quam per pulmones. Bartholinus in Anat. IV. renov. p. 410 afferit *avibus quibusdam aquaticis esse foramen ovale, quo inflar fetus in aquis sine pulmonum usu subinde vivere possint;* nihilominus in nassis eas non raro suffocatas inventimus. Quanto minus hirundines, quibus tale foramen deficit, sine suffocatione in aqua degere possent. Denique si hirundinibus structura cordis talis data esset, ut in aqua possent & deberent delitescere, cur frustra concessa est, iis, quæ in australibus Europæ regionibus habitant?

§. IX.

Sexta ratio: Anno 1763 accidit, quod nunquam antea observare contigit: Nempe hirundines urbicæ Aboam redierunt die I. Maji, cum tamen glacies non ante hunc ipsum diem omnis flumen nostrum reliquisset, nec adhuc in sinibus maris liquata esset. Dicat itaque quis, se concedere hanc speciem migrare; aliam tamen speciem esse, nempe Prognem, quæ cum veris tempore serius in conspectum prodeat, in aquis hospitari potuerant. Huic opponam testimonium Commissarii Parœciæ Templi Novi Dni Gotleben, qui eodem hoc anno observavit hanc ipsam speciem solito maturius apparuisse, vulgo admodum mirante ejus adventum, quod glacies flumina, stagna sinusque maris proximos adhuc tegeret. In specie eum non errasse certus sum, cum mihi diligentius inquirent accurate satisfacere posset. Sic ex allatis rationibus patet, fabulam errore inventam & coram pueris relatam, tam altas in plerorumque animis egisse radices, ut deinde per totam vitam sibi persuaserint verissima esse, quæ a Parentibus vel ab aliis auctoritate qualicunque valentibus audiverint.

§. X.

Cum jam per has rationes evicerim, hirundines brumali tempore non esse aquæ incolas, & Dnus Collinsonus Anglus, ut in indicationibus Göttingensibus video, de eadem re dubitans, diligenter, sed frustra tamen, arundinetum Tamesis fluvii perten-

C tave-

taverit; restat ut pro migratoriis habeam. Et quidni aviculae autumno disparentes migrant, cum quedam animalia quadrupedia ad fretum Hudsonis habitantia omni hyeme australes regiones petant, & vere redeant, ut Edvard. in Ornithologia memorie prodit; & Mus Norvegicus (Lemmus) referente Wormio in Hist. anim. *statis temporibus Alpes suas relinquat.* Si vero Coturnices, quas ad longiorem volatum ineptas reddi crederes, non solum a multa carne & brevibus alis, sed etiam ab intermissione alarum usu per totum tempus, quo apud nos degunt, in nulla tamen Europae regione per hyemem maneant; sed in Africam transfretent, teste Bellonio, qui abeuntes autumno & redeuntes vere in mari mediterraneo navigans observavit; mihi certe, qui volatum hirundinis rapidissimum toties miratus sum, videtur, ei tales concessas esse alas, ut ad commutandum locum, quam primum incommodus esse incepit, sufficerent. Id ita esse probat Collinsonus testimonio Equitis Wager, qui agmina hirundinum super omnia maria iter instituere vidit, & D:ni Adansonii, qui in Senegal eas invenit sed steriles. Ideoque jam ordo jubet Commonstratorem itineris, Indicem temporis, Viam ipsam Locumque qui exules recipiat, considerare.

§ XL

Qui attentius observaverit redditum avicularum, eas vento secundo esse usas, & quamdiu non est secun-

secundus, hunc illas exspectare inveniet. Die 30 Aprilis (1763) ventus flavit ab oriente, & sequente die seu i Maji, quo eas primum vidi, ab Euro austro, ambobus diebus valentior, ut eo sublevatae magnum iter paucis horis peragrare potuerint, cum tam pernicibus alis ipsæ gaudeant. Inter Aboam proximumque Estoniæ promontorium, quod versus Euro-Austrum situm est, viginti circiter sunt millaria Svecana; si itaque verum est, quod Kraftius affirmat (§. 332.) procellam impetuosissimam quovis minuto secundo percurrere pedes Londinenses 66, id est quavis hora $6\frac{2}{3}$ millaria Svecana, sequitur eandem procellam, quæ jam hic furit, viginti millaria 3 horarum spatio peragrasse. Hirundines autem si eadem procella ferantur, cum hæ volatus celeritate, ventum etiam vehementiorem antevertere non sine ratione credantur, adhuc breviore tempore iter hoc emensuras. Cur itaque hirundo, quæ totos dies volando consumit, trajectum tam brevi tempore absolvendum reformidaret. Aviculis nec discedentibus nec redeuntibus defuturum unquam ventum secundum, spondeo, cum quovis anno mense Augusto venti inter occasum & leptencionem medii (si numerus instituatur per quatuor illos gradus, quibus celeritatem vimque ventorum metiri solent Meteorologi) decem integros dies cum semisse spirent: Septembri fere duodecim; Aprili vero venti inter orientem & austrum medii dies undecim cum duobus trientibus regent: Majio decem cum dimidio. Quoniam autem quovis anno

ventus secundus eodem mensis die non spiret, non possunt semper eodem die itineri se accingere.

§. XII.

Gruum agmina citro retroque commeantia facile diuque oculis prosequimur, aviculas vero redentes non videmus, sed rediisse tum primum apparet, cum quælibet ad pristinum diversorium apulit: Abeuntium catervam nemo facile observat, nec si præsto quis est & attendens, oculis tam diu comitari valet, ut pro re certa profectionem venditare possit. Proficiscentes tamen semel vel bis mihi contigit observare: vocem multitudinis tunc audivi, sed tam alte volantis, ut vix ipsas videre potuerim, nisi per breve telescopium. Eas in proximtu esse ad iter ingrediendum scimus, quando inusitatam earum multitudinem congregatam cernimus; ita, cum templi Lundensis tectum hirundinibus obnubilatum erat, magnæ partis Sveciæ hirundines ibi congregatas credidit Celeberr. Præses. Ergo migrare mox eas oportuit; num vero per insulas Danicas, vel directe ad Pomeraniam e vento judicari potuerat, si quis attendisset. Idem affirmat Auctor Libri: *A tour thro' the Whole Island of Great Britain*, his verbis: *In tectis templi & vicinarum ædium civitatis Sout-Would miram hirundinum multitudinem congregatam vidi. Cumque de causa virum quendam gravem interrogarem, id responsi tuli: Eas hic exspectare ventum secundum, quo adjutæ in terram continentem trajicerent. Postero vero die, cum oppor-*

opportune ventus Zephyro-boreas flaret; omnes diffan-
ruere, nec unica postea hoc autumno visa. Sed in iti-
nere constitutæ non possunt proficisci nisi valde ex-
tenso agmine, ne una alteri præripiat insecta, quæ
pro viatico singulis esse debent; ideoque earum pro-
fœtio in oculos difficile incurrit. Monitores ad i-
ter ingrediendum sunt calor vernalis & frigus au-
tumnale. Frigus cum majus sit flantibus ventis in-
ter septentrionem & occidentem mediis, præsertim
cum vehementiores sunt, cœlumque nubibus testum,
efficit non solum, ut hirundines nostræ nullas mo-
ras nestant, sed etiam, ut earum transitus ad Esto-
niam facilius citiusque promoveatur. Calor stimu-
los venereo in avibus excitat, ut stabula antea fre-
quentata, nidosque consuetos desiderare incipient;
nam venti inter orientem & austrum medii e ter-
ra continente, quam peragrant, calorem adferunt,
simulque ad nos reddituras sublevant.

S. XIII.

Tempus abitus atque reditus aliud atque aliud
 esse compemus; differt enim *primo* pro specie.
 Nam *Apus auribus oculisque raro adventum*, pro-
 dit ante diem vigesimum *Majì*; *Urbica* die sexto vel
 septimo; *Rustica* vero quæ *Progne quoque dicitur*,
 die decimo mensis ejusdem. Sed medium adventus
 tempus adfero ex observationibus per quindecim an-
 nos Aboæ continuatis. Singulæ enim species uno
 anno maturius, altero seriùs adveniunt. *Apus al-*
 tissime volat, non solum, ut ea insecta capiat, quæ

ad sublimiorem aëris tractum se elevant, sed etiam, quod ampliores anfractus volitando faciat, nec tam cito volatum infestere possit, ut Progne, cui inter tecta domusque facilis est versura. Apus vero, quæ ultima, inter omnes Hirundinum species, venit, prima est, quæ in fugam se conjiciat, idque ante medium Augusti, postquam decem vel ad summum duodecim septimanas apud nos egit. Ratio tam maturati abitus, sine dubio, in eo quærenda est, quod per Augusti imbres insecta ab ea aëris regione deturbentur, quam Apus frequentat. Hinc ne fame periclitetur, ad terras australes se recipere cogitur. Urbica non multo post Apodem insequitur; idque ob eandem rationem. Rustica autem ultima est, quam infectorum raritas in fugam agat; quod insecta juxta plateas, parietes & tecta debeat venari. Hæc stationis tempus habet 18, imo interdum 20 septimanarum. Secundum differt prouti clima fuerit; in regionibus enim magis australibus maturius redit: ad Italiam teste Plinio (Liber. II. C. 47. & Liber. VIII. C. 26.) septimo calendarum Martii. Cum jam primus Martii dies, quem Romani vocabant Calendas, secundum Sosigenis calendarium a Julio Cæsare introductum & denominatum, in ipso æquinoctii punto inciderit, cumque inter Iulium Cæsarem & Plinium fuerint præter propter Anni 127, atque annus Julianus undecim minuta habeat præter justum æquumque, hæc minuta multiplicata per 127 dent 23 horas & 17 minuta, siue diem fere integrum, sequitur sextum Calendarum

rum Martii fuisse, quem Plinius septimum vocat,
 huncque cum Calendario nostro collatum esse 15
 Martii. In provincia Angliae Hertfordshire die 6
 Aprilis: in Quebec d. 25 Aprilis, teste Dn. Prof.
 KAEM in itin. Amerie. Ad Scaniam d. 30 Aprilis.
 Vasani vero Ostrobothniæ urbem appellunt unum al-
 terumve diem serius, quam Aboam, vel post tan-
 tum temporis, quantum ob distantiam locorum vo-
 latus requirit. Angliam relinquunt initio Octobris,
 observante Auctore Libri a Thour thro the Whole
 Island of Great Britain. Ab Italia recedunt die
 5 Octobris St. n. Sic enim Plinius Lib. VIII. C.
 31. Arcturus oritur pridie idus septembribus: signum o-
 rientis ejus sideris servetur birundinum abitus, nam
 deprehensa intereunt. Sed quomodo hæc cohærent?
 Debent hirundines æque timere frigus Italiae ac
 Finlandiae? Prognen non raro vidi Aboæ medio
 Septembribus, & temel meis oculis initio Octobris.
 Hinc primum esset concludere hirundines Italiae ab-
 itum ad diem Martini & ultra debere proferre.
 Sed Plinium falsum non esse, clarum est ex adser-
 to hoc Secretarii Acad. Scient. Svec. & Equitis Dni
 Wargentin in Act. Stockh. Anni 1763 p. 12. In I-
 talia multo largiores imbræ cadere quam in nostra Pa-
 tria solumque mensis Octobrem pluviam integrum fore
 pedem altam dedisse. Hinc concludo, Septembrem
 ad minimum tantam pluviam habere, quantam a-
 pud nos Augustus. Ergo sequitur pluviam & inde
 factam infectorum raritatem non vero frigus Ita-
 liae hirundines initio Octobris abigere. An itaque

in

in Colchide & in tractu quodam sylvoso Peruviae
ullo tempore habitare possint hirundines, dubito;
cum has terras continua pluviis madere constet,
referente de priore Chardino in itinere Persico, &
de posteriore Condamineo in itin. p. 27.

§. XIV.

Jam ad quæstionem responderi debet, quo ten-
dant omnes hirundines e tota Europa emigrantes?
In Hispania & forte etiam in Gallia, Britannia at-
que Belgio educatas probabile est fretum Gadita-
num superare & in partem Africæ occidentalem di-
verti; cum enim in Willughbeji Ornithologia p.
155, dicatur, Auctorem *hirundinum ingentem copiam*
Valentie Hispaniae in foro venalium vidisse sub finem
Septembris, concludo plures, quam Hispaniæ partis
septentrionalis hirundines in eo loco congregatas
fuisse, & ibi tempestatem oportunam exspectasse,
qua allevante in Africam trajicerent, Vidimus §.
I. Aldrovandum & Rajum cum Petro Martyre cre-
dere eas in Ægyptum & Æthiopiam discedere; I-
dem fere Plinius statuere videtur, cum dicat *Hir-
undines bis parere in Ægypto etiam brumali mense.*
Lib. X. C. 53. Perpendamus ergo, num eo tem-
pore, quo nos reliquerant, tales in Ægypto inve-
niant aëris constitutionem, ut, quamdiu apud nos
regnet hyems, ibi commode diverti & bene vale-
re possint. Hasselquistius noster, qui per integrum
annum in Ægypto degit, hunc in modum loqui-
tur: *Terra Ægypti per Augsti & Septembris men-*
ses,

ses, per aquam intumescentis Nili in lacum convertitur. Mensibus Octobri & Novembri Seminatores officium suum faciunt; sed minore sudore, & tamen maiore fiducia messis prospere, quam nos. Decembri, Januario, Februario & Martio Ægyptii æstatem suam habent; nam

Omnia jam rident, jam formosissimus annus.

Messis tempus adest mense Aprili. Majo incipiente borrenda aëris constitutio Ægyptio incumbit; ardor enim intolerabilis terram torret, & berbis producendis atque alendis, æque ineptam reddit ac Patriam nostram byems. Sic Ægyptus per nostram hyemem adeo lata, horrorem per nostram æstatem incutit intuenii. Aves tunc eam deserunt, & ad septentrionales regiones remeant. Ne quis autem putet Januarium Ægypto frigidorem esse, quam ut hirundines eum sustinere possint, sequentia addam: Die 10 Januarii altitudo Solis meridiana fere convenit cum ea altitudine, quam sol meridiano tempore Aboæ habet die 1 Maji. Sed in Ægypto Sol mense Januario effigacia majore pollet quam dicta Maji die apud nos, atque forte quibusdam diebus æquali ei, quam medio fere Julii fentimus; quia frigus Finlandiaz ab hyeme residuum, secundum Thermo-metri testimonium, fere mensem, peracto solstitio Cancri, requirit, antequam a Sole perfecte subi-gi possit.

§. XV.

Vidimus itaque locum, in quo hirundines nostræ frigora Europæ fugientes Azylum invenire possint. Ipsa ratio indigit, eas, natura commōstrante, illuc præcipue tendere debere; quod vero ita etiam faciant, concludere possumus ex his verbis Plinii Lib. X. C. 33. In Ægypti Heracleotico ostio molem continuatione nidorum vaganti Nilo inex-
pugnabilem opponunt stadii fere unius spatio, quod hu-
mana opera perfici non posset. Ex loco ejusdem Au-
toris nuper citato scimus, hirundines in Ægypto
hospitantes brumali tempore etiam parere, adeoque
nidos ibidem struere debere; Sed cum indigenæ
solæ non sufficient tam vastis molibus sola nidorum
congerie Nilo opponendis, advenis certe e ma-
gna Europæ parte huc confluentibus opus illud est
adscribendum. Apud nos hirundo nidum ex lu-
to, fœno & stramine intertexto struit, ædiumque
testudinibus, laquearibus atque tignis arcte adeo
subnectere novit, ut ruinam non metuat, lo-
cumque tanta prudentia eligit, ut ab effuso im-
bre, a muribus vel ab aliis direptoribus nil peri-
culi metuendum habeat. Sed in Ægypto omnes il-
læ, quæ ab urbibus pagis & tuguriis, spatio des-
ciente, excluduntur, ut Nilo sint propiores, & in-
fecta Nilo oriunda venentur, domicilia ex simili
luto arteque eadem contexta, præcipitio ripæ affi-
gunt, ibique æque securè habitant, ac sub suggrun-
diis tectorum atque ædium lapidearum fenestris &
coronicibus in Europa. Sed unde victus suppetit

tam

tam stupendo numero? In locis stagno vel ichthiotrophio vicinis culicum detestabilis est constipatio, quid ergo mirum, quod tantæ hirundinum multitudini in Ægypto victus suppetat, cum per duos menses tota nuper in stagnum conversa fuerit, & aqua tandem in Nili alveum rediens, larvas culicum aliquorumque insectorum, metamorphosin ibi subituras secum vehat. Sic plagarum Pharaonis unum forte vel specimen vel exemplum quotannis paternentur incolæ, nisi aërem purgarent hirundines. Sed præter culices protervas illas bestiolas, quæ sanguinem humanum adeo sitiunt, alia dantur insecta aquatica: Ephemerae, Hemerobii, Phryganeæ, Libellulæ &c., ideoque fami nullus erit locus. Cum itaque hirundinum venatio ipsis nutrimentum comparet, & simul hominibus securitatem a protervia culicum procuret, hic sapientissimam Summi Numinis œconomiam, ut ubique, miramur & deve-ramur.

§. XVI.

Ex relatione Hasselquistii intelleximus, aëris constitutionem, quam in Ægypto sentiunt, quamdiu frigus eas ab Europa arcet, iis admodum favere. Ideoque ab hoc diversorio non egrediuntur nisi coactæ. Cogit autem Solis ardor, quamprimum nimius esse inceperit. Nam ut frigoris impatiens sunt, ita majorem gradum caloris eas ægre ferre observavi; vidi enim per rimam fuggrundiæ in frontispicio domus; cui nidum suffixerat, redeuntem su-

pinam incubare ovis, & impatientiam ardoris, qui forte eodem die viguit, anhelatione & rostro aper-to demonstrare. Hinc ab Hasselquistio facile per-svadeor, hirundines tanto minus calorem climatis fervidioris sufferre posse; Sed eo ingruente, redditum ad nos accelerare. Hocque eo verisimilius credi-puto, quod neque insecta, quibus solis vicitant, tantum calorem tolerent. Nam ex relatione Nau-tarum scio, pediculos, a quibus misere vexantur in climatibus frigidis & temperatis, in zona torri-da omnes interire. Nec Hasselquistius reticet; quod insecta in magno illo Ægypti æstu, aut latibula quæ-rant, aut exsiccata moriantur. A vestimentis pel-liceis, si in Solem exponantur, calor nostri etiam climatis Dermestes lardarios fugat. Plurima alia insecta apud nos mediæ diei ardorem ut declinent, umbram quærunt: Exempli loco, inter innumera, sola larva Phalænæ neustriæ sufficit. Hinc non so-lum ardor cœli ferventioris, sed etiam inopia in-sectorum eas in fugam agit. Nec avibus, præser-tim nostro climati adsuetis, arridere longas illas noctes credo, quas in illo terræ tractu pervigiles fere transigunt; cum apud nos brevissima nox so-mno, cui aves minime, indulgent, sufficiat; & lon-gior dies cum calore temperato educationi pullo-rum magis faveat.

§. XVII.

Sed redditus ad nos non omni anno eodem men-sis die accedit; non enim possunt iter inceptum con-tinui-

tinuare, priusquam aëri in transmarinis regionibus restitutus calor eas successive invitet; nam æstas serpit septentrionem versus, & mense transacto, postquam Ægyptum deseruere hirundines, iis comitantibus ad nos pervenit. Sed & venti ratione eas habere verisimile est; idque pro causa reputandum, quod interdum serius adveniant, etiamsi per plures dies caloris satis magnus gradus eas exspectaverat, quodque calore regionis transmarinæ commonefaetæ, vento juvante, interdum redeant, antequam apud nos frigus esse desiit. In posteriore casu mutantæ circumvolant, utut calente cœlo maxime vocales esse soleant. Si autem post adventum, frigus calorem excipiat, in nidis per unum alterumve diem delitescunt; quem morem Passerem domesticum etiam, quando hyems sævit, sequi notum est. Nec majores aves magis accurate tempus redeundi commodum semper observant; Visæ enim aliquando sunt Grues, quæ frigore & inedia perierunt, repertæque mortuæ in fœnilibus pratinibus vacuis Finlandiæ, quod improvidæ adventum nimis maturaverant, prolectæ a tempestate jucunda, quæ sine dubio eo anno, multo citius in transmarinis regionibus, quam apud nos regnare incepit.

§. XVIII.

Si quis autem interroget, quomodo hæc cohæreant, quod Hasselquistius dicat, aves Majo incipiente Ægyptum deserere, & tamen hirundines ad nos interdum redeunt ad finem Aprilis, aliæ ve-

ro species avium adhuc citius? Respondebo: Auctoris nostri effatum non determinate debet accipi; quis enim supponere potest eum, cui cura diversissima erat, adeo anxie œconomiam avium observasse. Certius autem est, eum voluisse dicere eas dicto tempore abiisse, non vero tum primum abire. Aprilis enim initio Ægyptum deseruisse hirundines nostras ratio dictitat, quoniam hoc mensa major æstas in Ægypto sit oportet, quam apud nos Julio, cum altitudo solis meridiana die 8 Aprilis sit 67 gr. 50 m. sed in ipso Solstitio Cancri apud nos non superet 53. gr. & 3 m. Si calor noster maximus incommodus est hirundinibus, quod ex § 16 patet, quanto magis is, qui eo major est. Causam autem quare hirundines Italiæ multo adhuc citius Africam relinquant, inde deduco, quod alium Africæ locum, per Siciliam profectæ, adierint, ubi calorem Africæ proprium citius experiuntur, quam quæ in Ægypto commorantur. Sic hirundines Italiæ per 29 septimanas in Africa sedem habent, in Italia vero per 23, ideoque a dimidio ferre anni mora Plinius *semestres* vocat. Nostrarum vero Progne, si per Poloniam, Moldaviam, Græciam Cretamque profiscatur, iter milliarium Svecicorum 336 conficiendum habet, antequam Ægyptum appellat. Si itaque supponatur eam quavis hora 2 milliaria propria vi & a nullo vento adiutam volare, 24 milliaria per diem volabit, & sic diebus quatuordecim totum hoc iter absolvet. Si jam medio Septembbris nos deserat, ante finem ejus-

jusdem mensis ad Ægyptum perveniet. Sed licet rapidissimo volatu inter omnes, quæ quidem mihi innotuere aves, prædita sit, cujus exemplum Niso appropinquante elamitans ostendit, per innumeræ ambages, velut nesciens, migrat; quia vix opus est, ut properet; sat enim cito advenit, postquam integrum mensem in itinere consumsit. Et si redditu tantundem temporis assignetur, commoratio in Ægypto erit 25 septimanarum, scilicet a medio Octobris ad diem 10 Aprilis, quod tempus ei vix superfluum erit, ob breves dies; cum e contrario 19 septimanarum mora apud nos ei sufficere sciamus ob dies multo longiores. Sed & verisimile videri posset hirundinem dies jucundos pastui, procellosos vero & pluviosos profectioni impendere. Si ita res se habeat, durante procella cujus exemplum attuli §. XI. Ægyptum adtinget antequam 31 horas & 11 minuta toti itineri tribuerat. Hoc si factul possibile videatur, quidni etiam ex Wageri experientia (§ nostra X.) sequitur eam ab America ad nos usque aliquando pervenire posse; & quidni cum Baronettus Sloane in itinere Jamaicensi viderit Cicadarum nubes super Oceani altioreum alveum volantes, quæ ex Asia in Americam super immensum mare iter faciunt. Bær. Prælect. T. vi. p. 178.

Contra hanc meam sententiam objici posset, quod secundum recentiorum quorundam hypothesin procella a zephyro flans initium capiat versus orientem, & successive promoteatur versus regionem occasui propiorem: Hoc quo modo fiat imaginari possu-

possumus, cum in Arenario vitro, quo horas metimur, videmus ad centrum fluere arenam primo proximam, deinde remotiorem, tandemque remotissimam. Cum jam 22 gradus sive 231 millaria Svecana Terram Novam insulam Americæ septentrionalis ab Hibernia dirimant, procellæ § XI apud nos ortæ opus est horis 34 antequam eo procedere possit, ut in America flare incipiat. Si tunc hirundines ductori vento statim obedientes sint, post horas 22 ad Europam pervenient, quoniam nullis ambagibus retardatae quatuor millaria horæ spatio propriis viribus absolvere supponuntur. Ideoque totam viam inter Americam & Europam non emetientur, antequam apud nos per 56 horas hæc tempestas duravit. Cum vero per tot horas non perseveret procella, hirundines ad Europam pervenire frustra tentant? Sed respondeo: non omnes Naucleros frui felice navigatione, nec hirundines semper transitu. Cum autem procellas 70 horas flantes interdum experiamur, quis non videt hirundines tunc in salvo esse. Sed nec sic omne dubium sublatum est; quæri enim potest, quomodo alarum robur volatum tam diu protractum sustinere possit? Dissidentium gratia ponam non posse, quoniam hanc positionem per alteram compensare in promptu est: nempe hirundines lassas in superficie maris requiescere; non enim video, quomodo alias explicem experientiam Ofbeckii nostri, qui non longe ab insulis Canariis observavit hirundines, quarum plumæ cœlo sereno, madidæ erant. Quod autem

tem hirundo sine periculo in superficie maris (non frigidi) possit quiescere, aliquo modo testatur § VIII, quæ ejus levitatem cum aqua puteali obiter comparat; Sed adhuc certius id videbitur, postquam gravitas ejus specifica per gravitatem aquæ maris Atlantici insigniter imminuta est.

§. XIX.

Hirundines quolibet anno apud nos pullos lignunt. Si itaque una in urbe centum hirundinum paria nidificant, & quodlibet par quinque pullos producat, autumno numerus erit 700; nihilominus vere in sequente numerum redeuntium non maiorem videmus, quam vere anni præteriti. Unde hoc provenit? credo multas perire in longa illa via, quam vere & autumno emetuntur: ab accipitrum quidem ungibus alæ eas securas præstant; sed in campus patentibus Uerainiæ, aliisque his similibus locis, ubi nec arbores, nec frutices, nec arundines sunt, cum humi pernoctare debeant, insidiis patent gremium & aliarum bestiolarum, quæ per tenebras grasantur. Sed & magnum numerum in mari vel mediterraneo vel Codano suffocari puto; quando enim ventus non favet, sed uti non adeo raro fit, uno eodemque die a pluribus cœli plagis flet, tum illæ, quibus pro Cynosura ventus est, huc illuc diu aetæ, tandem in mare præcipitantur & si frigidum est ibi intereunt; Si dicat aliquis, ventum interdum favere debere, nihilominus nunquam ultra ducentas redeunt, etiamsi septingentæ abierint? Hoc solum responsi loco adferrè possum: Verisimile es-

se, plerasque juniorum eum indigenis in Ægypto retineri, & postea, ardore solis fatigatas, interire; cum paucitas insectorum per tantum hirundinum numerum dispertita, humores calore exhaustos sufficiente quantitate non restituat, nec aquæ potuſe reficere unquam observatae sint. Plerasque dico, cum credibile sit, cœlibem novam nuptam ex junioribus reducere & viduam sponsum. Quod vero quidam nisi apud nos deserti maneant, inde evenisse existimo, quod quæ illas struxerant ambæ in peregrinatione sint mortuæ vel ab aucupibus occisæ; cum hic allegare possem morem Hispanorum forte & aliarum gentium eas in culinæ usum capientium, conf. § nostram XIV. Etiam si plane ignorem quali in hac capture ingenio utantur vel Hispani vel reliqui.

§. XX.

Sic nostro, id est simplici, modo primo annisi sumus, ut hirundines a diversorio subaquoso aliisque minus aptis liberaremus, & azylom, hyeme ingruente, quærendum indigitavimus. Deinde easdem in utraque mansione consideravimus; quin etiam commutantes locum in via, eo quo potuimus modo, comitati sumus. Ne autem quis nobis vitio veritat, quod pluribus, quam opus videri posset argumentis vulgi sententiam oppugnaverimus, hæc ad excusationem nostram adjicere placuit; Quod disputationibus cum vulgo pervicaci toties habitis adeo commoti redditii simus, ut his argumentis velut totidem telis contra adversam sententiam in arena uti necessum fuerit. Quidni ergo Doctis etiam aciem telorum omnium ostendere liceat, quo nobiscum mirentur contumaciam, vulgi adeo duram fuisse, ut ne acutissimis quidem telis confici potuerit.

SOLI DEO GLORIA.